

BOSNA I HERCEGOVINA
Federacija Bosne i Hercegovine
TUZLANSKI KANTON
Ministarstvo obrazovanja i nauke
Broj: 10/1-34-026391-8/22
Tuzla, 04.01.2023. godine

Ministarstvo obrazovanja i nauke Tuzlanskog kantona, u postupku po zahtjevu Visoke škole za finansije i računovodstvo FINra Tuzla broj: 01-757-1/20 od 14.07.2022. godine, za licenciranje studijskog programa „Turizam, ugostiteljstvo i gastronomija“, na osnovu člana 27. stav (6) Zakona o visokom obrazovanju – prečišćeni tekst („Službene novine Tuzlanskog kantona“ broj: 21/21, 5/22, 11/22 i 16/22) i člana 21. stav (1) Pravilnika o postupku licenciranja studijskih programa prvog, drugog i trećeg ciklusa studija visokoškolskih ustanova na području Tuzlanskog kantona („Službene novine Tuzlanskog kantona“ broj: 9/22), donosi

RJEŠENJE

1. Visokoj školi za finansije i računovodstvo FINra Tuzla, odobrava se izvođenje studijskog programa „Turizam, ugostiteljstvo i gastronomija“ na prvom ciklusu studija, čijim završetkom se stiče zvanje Bachelor turizma, ugostiteljstva i gastronomije 180 ECTS (usmjerenje turistički vodič i gastronomija – kulinarstvo); Bachelor turizma, ugostiteljstva i gastronomije 240 ECTS (usmjerenje ugostiteljstvo i turizam).

2. Dozvola za izvođenje studijskog programa (licenca) za studijski program iz tačke 1. ovog rješenja izdaje se na period od pet godina, i vrijedi za upis studenata počev od naredne akademske godine.

3. Ovo rješenje proizvodi pravno dejstvo danom njegovog donošenja.

Obrazloženje

Ministarstvo obrazovanja i nauke Tuzlanskog kantona (u daljem tekstu: Ministarstvo) zaprimilo je zahtjev Visoke škole za finansije i računovodstvo FINra Tuzla broj: 01-757-1/20 od 14.07.2022. godine, za licenciranje studijskog programa „Turizam, ugostiteljstvo i gastronomija“. Postupajući po predmetnom zahtjevu, u skladu sa odredbom člana 27. stav (4) Zakona o visokom obrazovanju – prečišćeni tekst („Službene novine Tuzlanskog kantona“ broj: 21/21, 5/22, 11/22 i 16/22, u daljem tekstu: Zakon) i člana 11. Pravilnika o postupku licenciranja studijskih programa prvog, drugog i trećeg ciklusa studija visokoškolskih ustanova na području Tuzlanskog kantona („Službene novine Tuzlanskog kantona“ broj: 9/22, u daljem tekstu: Pravilnik), Ministarstvo obrazovanja i nauke Tuzlanskog kantona, rješenjem broj: 10/1-34-026391-2/22 od 01.09.2022. godine, imenovalo je Komisiju za licenciranje studijskog programa prvog ciklusa studija „Turizam, ugostiteljstvo i gastronomija“ na predmetnoj visokoškolskoj ustanovi (u daljem tekstu: Komisija), koja je izvršila vrednovanje predloženog studijskog programa u skladu sa kriterijima za licenciranje utvrđenim članom 8. Pravilnika i u skladu sa odredbom člana 18. Pravilnika sačinila i Ministarstvu dostavila Izvještaj u kome su, između ostalog, navedene sljedeće činjenice:

Predloženi studijski program svojom strukturom usklađen je sa članom 126. stav (2) Zakona kojim je propisan sadržaj studijskog programa, odnosno isti sadrži minimum propisanih elemenata. Takođe, predloženi studijski program svojom strukturom prati principe Bolonjske deklaracije. Komisija nema zadatak da ulazi u to na koji način će se u perspektivi implementirati pojedine nastavne jedinice i akademski sadržaji, već cijeni da li u momentu razmatranja istih postoji ili ne postoji ispunjenost pojedinih kriterija propisanih važećim propisima, s obzirom na to da je zadatak nadležnih organa da u perspektivi cijene način na koji se dati studijski program implementira. Kada je u pitanju kvalitet akademskog sadržaja, isti u dovoljnoj mjeri, smatramo, zadovoljava propisani kriterij za njegovo licenciranje, odnosno svojim sadržajem slijedi savremene naučne zahtjeve iz date naučne oblasti, koji nude dovoljno kvalitetne osnove za uključivanje budućih svršenih studenata na tržište rada. Osim toga,

koncipiran je u skladu sa sličnim licenciranim studijskim programima relevantnih domaćih i regionalnih visokoškolskih ustanova. Ako bi se predloženi studijski program implementirao u svom punom kapacitetu, onako kako je to naznačeno u sadržaju istog, završetkom studija studenti, smatramo, stiču potrebna znanja i vještine za rad u predmetnoj oblasti, koji kroz svoj sadržaj (nastavne predmete) studentima nudi kvalitetne osnove za uključivanje na tržište rada. U doba kad menadžment i biznis u turizmu postaju sve prisutnije u svim aspektima poslovanja, studenti na studijskom programu „Turizam, ugostiteljstvo i gastronomija“ će kroz sticanje temeljnih znanja iz oblasti turizma, ugostiteljstva i gastronomije, steći kompetencije fundamentalnog poznavanja i razumijevanja principa turizma, ugostiteljstva i gastronomije, sposobnost rješavanja konkretnih problema u turizmu, ugostiteljstvu i gastronomiji, te sposobnost adekvatnog organizovanja turističke, ugostiteljske i gastronomske ponude, kao i stručne kvalifikacije u cilju kreiranja i razvoja turističke ponude, te sposobnost i vještine za gastronomsku ponudu na tržištu, promociju i marketing iste. Ishodi učenja na studijskom programu „Turizam, ugostiteljstvo i gastronomija“ usklađeni su sa savremenim naučnim zahtjevima i međunarodnim iskustvima, te postoji jasna povezanost ishoda učenja sa ishodima koji su navedeni u silabusima pojedinačnih nastavnih predmeta. Uspješna realizacija studijskog programa „Turizam, ugostiteljstvo i gastronomija“, mišljenja smo, omogućava diplomantima sticanje kako opštih, tako i specifičnih kompetencija i vještina, kao podloge za njihovo aktivno i uspješno uključivanje na tržištu rada, a kasnije i u privatnim ili javnim kompanijama u kojima će naći svoje mjesto. Ishodi učenja na studijskom programu „Turizam, ugostiteljstvo i gastronomija“ usklađeni su sa savremenim naučnim zahtjevima i međunarodnim iskustvima. Osim toga, završetak studija na studijskom programu „Turizam, ugostiteljstvo i gastronomija“, zahvaljujući širokom spektru multidisciplinarnih znanja, nudi široke mogućnosti zaposlenja. Bosna i Hercegovina, ali i cijela Evropa pa i svijet, planiraju razvoj turizma kao jednu od onih privrednih grana koje su u mogućnosti da valorizuju i unaprijede one prirodne i antropogene resurse koje nije moguće koristiti ili nisu efikasni u drugim djelatnostima. Studijski program Turizam, ugostiteljstvo i gastronomija koncipiran je tako da prati trendove obrazovanja u svijetu, pri čemu su korišteni i primjeri dobre prakse u Bosni i Hercegovini, balkanskom okruženju, Evropi i svijetu. Sadržaji studijskog programa koncipirani su na osnovu ključnih znanja i vještina iz oblasti menadžmenta i biznisa u turizmu, koja studenti treba da usvoje tokom procesa studiranja. Ishodi učenja i kompetencije oslanjaju se na zahtjeve kako discipline, tako i društva po pitanju mogućnosti zapošljavanja i pripremanja studenata za aktivno učešće u građanskom društvu. Po pitanju kapacitiranosti visokoškolske ustanove da realizuje nastavne sadržaje pojedinih nastavnih predmeta (tj. da provede predloženi studijski program), konstatujemo da je Komisija dana 26.09.2022. godine izvršila posjetu istoj, te da je pored priloženih materijalnih dokaza, imala priliku neposredno utvrđivati činjenice vezane za postojanje odgovarajućeg prostora, biblioteke, računarskih sala, stalne internet konekcije, odgovarajući pristup objektu i prostorijama unutar visokoškolske ustanove licima sa invaliditetom, te adekvatna nastavna sredstva da u skladu sa zahtjevima studijskog programa isti i realizuje. Konstatujemo da se Komisija neposredno uvjerila u postojanje odgovarajućeg prostora (učionice, amfiteatar, čitaonički prostor), biblioteke, odgovarajućeg pristupa objektu i prostorijama unutar visokoškolske ustanove licima sa invaliditetom, opremljene računarske sale, pristupa internet konekciji, te drugu prateću infrastrukturu i opremu neophodnu za realizaciju predmetnog studijskog programa. Maksimalno opterećenje nastavnika u nastavi predviđeno Standardima i normativima visokog obrazovanja Tuzlanskog kantona iznosi 10 sati predavanja sedmično u okviru 40-satne radne sedmice, prosječno na godišnjem nivou, a za asistenta 15 sati vježbi sedmično prosječno na godišnjem nivou. Nastavnici koji budu držali i vježbe, broj sati vježbi do optimalnog opterećenja se izračunava tako da su dva sata vježbi ekvivalentna jednom satu predavanja. Prema Zakonu (član 25.), visokoškolska ustanova ispunjava kadrovske uslove ako ima u radnom odnosu najmanje jednu polovinu od ukupnog broja nastavnika potrebnih za izvođenje nastave na obaveznim nastavnim predmetima. Prema dostupnim podacima, na predmetnoj visokoškolskoj ustanovi osiguran je potreban nastavni kadar za realizaciju predmetnog studijskog programa. Što se tiče neakadenskog osoblja, prema dostupnim podacima predmetne visokoškolske ustanove ista je angažovala potrebno neakademsko osoblje u skladu sa Standardima i normativima visokog obrazovanja Tuzlanskog kantona.

Analiza strukture studijskog programa „Turizam, ugostiteljstvo i gastronomija“ pokazuje da je on usklađen sa principima Bolonjske deklaracije. To se ogleda u sljedećem: jasno je za svaki nastavni predmet naveden broj časova predavanja i vježbi, te vrijednost ECTS bodova (European Credit Transfer System) koji nosi određeni predmet zbir bodova svih predmeta u jednoj godini je 60 ECTS bodova, način polaganja ispita, pri čemu se sve aktivnosti studenta predviđene silabusima boduju, predispitne obaveze (kolokviji, projekti, seminarski radovi) i završni ispit, kroz silabuse pojedinačnih nastavnih predmeta je vidljiva vrijednost predmeta u ECTS bodovima, ishodi učenja, ciljevi učenja i sadržaj nastave po predviđenim sedmicama nastave, kao i način sticanje bodova (te vrijednost bodova za svaku aktivnost) kroz različite predispitne obaveze i završni ispit. Cijeneći sve navedeno Komisija je jednoglasnom odlukom dala pozitivnu ocjenu vezano za licenciranje studijskog programa „Turizam, ugostiteljstvo i gastronomija“.

Na osnovu konačne ocjene i mišljenja Komisije, u skladu sa odredbom člana 27. stav (6) i člana 21. stav (1) Pravilnika, odlučeno je kao u izreci ovog rješenja.

Pouka o pravnom lijeku:

Protiv ovog rješenja može se izjaviti žalba Komisiji za drugostepeno upravno rješavanje Vlade Tuzlanskog kantona, u roku od 15 dana od dana zaprimanja rješenja.

DOSTAVITI

1x FINra sa dostavnicom

1 x evidencija

1 x a/a



